




坤輿典第一百三十六卷

冢墓部藝文一

冢賦

漢張衡

載輿載步地勢是觀降此平土陟彼景山一升一降乃以斯安爾乃瞻巍山平險陸刊叢林鑿盤石超峻壘構大槩高岡冠其南平原承其北列石限其壇羅竹藩其域系以修隧洽以溝瀆曲折相連迤靡相屬乃樹靈木靈木戎戎繁霜峨峨匪雕匪琢周旋顧盼亦各有行乃相厥宇乃立厥堂直之以繩正之以日有覺其材以構元室奕奕將將崇棟廣宇在冬不涼在夏不暑祭祀是居神明是處修隧之際亦有掖門掖門之西十步餘半下有直渠上有平岸舟車之道交通舊館思淵慮弘存不忘亡恢厥廟壇子孫蒸嘗宅兆之形規矩之制晞而望之方以麗踐而行之巧以廣幽墓既美鬼神既靈降之以福如水之平如春之卉如日之升

修廬植墳墓令

魏武帝

故北中郎將盧植名著海內學爲儒宗士之楷模乃國之楨幹也昔武王入股封商容之閭鄭喪子

古今圖書集成
產而仲尼隕涕孤到此州嘉其餘風春秋之義賢者之後有異於人敬遣丞掾修墳墓并致薄饌以彰厥德

感丘賦二首

晉陸機

泛輕舟於西川背京室而電飛遵伊洛之坻渚沿黃河之曲湄觀墟墓于山梁託崇山以自綏見兆域之藹藹羅魁封之纍纍于是徘徊洛涯弭節河干佇盼留心慨爾遺歎仰終古以遠念窮萬緒乎其端伊人生之寄世猶水草乎山河應甄陶以歲改順通川而日過爾乃申舟人以遂往橫大川而有悲傷年命之倏忽怨天步之不幾雖履信而思順曾何足以保茲普天壤其弗免寧吾人之所辭願靈根之晚墜指歲暮而爲期生矜跡于當世死同宅乎一丘翳形骸以下淪兮漂營魂而上

浮隨陰陽以融冶託山原以爲疇妍媸混而爲一孰云識其所修必眇代以遠覽兮夫何徇乎區陳

登芒賦

傅咸

左光祿大夫濟北侯荀公前喪元妃及失令子葬於西芒有以感懷而作斯賦

何天道之難忱信厥命之靡常匪彼生之不辰亦大夫之多殃唯濟北之初載夙邁閔而逢罹興瓜

颺之綿綿飛英聲以風馳庶家道之克昌永保祚於螽斯愠無妄之爲灾怨上皇之有違在德門之方隆乃降厲於元妃蘭房聞其無主衆孤焚而莫依孔臨川以永歎趙有感於九原覽登芒之哀賦諒聖賢之同情

爲孫王墓置守塚人表

張俊

臣聞成湯革夏而封杞武王入殷而建宋春秋征伐則晉修虞祀燕祭齊廟夫一國爲一人興先賢爲後愚廢誠仁聖所哀悼而不忍也故三代敦繼絕之德春秋貴柔服之義昔漢高受命追存六國凡諸絕祚一時並祀親與項羽對爭存亡逮羽之死臨哭其喪將以位嘗侔尊力嘗均勢雖功奪其成而恩與其敗且暴興疾顛禮之若舊殘戮之尸乃以公葬若使羽位承前緒世有哲王一朝力屈全身從命則楚廟不隳有後可冀伏惟大晉應天順民武成止戈西戎有卽序之人京邑開吳蜀之館興滅加乎萬國繼絕接於百世雖三五弘道商周稱仁洋洋之美未足以喻是以孫氏雖家失吳祚而族蒙晉榮子弟量才比肩取進懷金侯服佩青千里當時受恩多有過望臣聞春雨潤木自葉流根鵲鳩恤功愛子及室故天稱罔極之恩聖有續繆之惠追惟吳僞武烈皇帝遭漢室之弱值亂

臣之強首倡義兵先衆犯難破董卓於陽人濟神器於甄井威振羣牧名顯往朝桓王才武弱冠承業招百越之士奮鷹揚之勢西赴許州將迎幼主雖元勳未終然至忠已著夫家積義勇之基世傳扶危之業進爲徇漢之臣退爲開吳之主而蒸嘗絕於三葉園陵殘於薪萊臣竊痛之伏見平吳之初明詔達錄先賢欲封其墓愚謂二君並宜應書故舉勞則力輸先代論德則惠存江南正刑則罪非晉寇從坐則異代已輕若列先賢之數蒙詔書之恩裁加表異以寵亡靈則人望克厭誰曰不宜二君私奴多在墓側今爲平民乞差五人蠲其徭役使四時修護頽毀掃除塋壟永以爲常

爲宋公修楚元王墓教

宋傅亮

夫褒賢崇德千載彌光尊本敬始義隆自遠楚元王積仁基德啟蕃斯境素風道業作範後昆本支之祚實隆鄙宗遺芳餘烈奮乎百世而丘封翳然墳塋莫翦感遠存往慨然永懷夫愛人懷樹甘棠且猶勿翦追甄墟墓信陵尙或不泯況瓜瓞所興開源自本者乎可蠲復近墓五家長給灑掃便可施行

爲卞彬謝修卞忠貞墓啟

梁任昉

臣彬啟伏見詔書并鄉義泰宣勅當賜修理臣亡高祖晉故驃騎大將軍建興忠貞公壺墳塋臣門緒不昌天道所昧忠構身危孝積家禍名教同悲隱淪惆悵而年世賈遷孤裔淪塞遂使碑表蕪滅丘樹荒毀狐兔成穴童牧哀歌感慨自哀日月躡迫陛下弘宣教義非求效於方今靈餘烈不泯固陳力於異世但加等之渥近闕於晉典樵蘇之刑遠流於皇代臣亦何人敢謝斯幸不任悲荷之至謹奉啟以聞謹啟

從樊漢南爲鹿門孟處士求修墓牋

唐符載

夫仁義揚顯朗德之充也惠慈被幽昧仁之原也竊見故鹿門孟處士浩然納靈含粹俠儒傑立文寶貴重價吞連城一旦殞落祚替陵蔑吁嗟丘隴頽陷荒園形或異斧高不及隱永懷若人行路慨然前日辦覺佛寺峴首亭恭覲明公垂意拳拳將墓文表隨封起窀穸闔境縉紳警聞嘉聲風動興感偕至踴躍然垂休務當時從善貴流今閣下外迫軍旅程使之劇內勞賓客俯仰之勤牽耗星歲未遑指顧常恐旦夕飛踐廊廟纏綿深旨鬱紆不寫則處士之風流精爽沉翳厚地矣或好事者乘而射之孤負夙志矣伏惟閣下醇仁盛德覆乎草木除惡彰善發於鄉黨割省庶務凝神晷刻盼睞

官屬望全首尾實足以副士林之翹翹慰羈魂之冥冥事關教化不主名譽伏惟慮之始終之幸甚幸甚

周公瑾墓下詩序

梁肅

昔趙文子觀九原有歸與之歎謝靈運適朱方興墓下之作或懷德異世或感舊一時而清詞雅義終古不歇十三年春予與友人歐陽仲山旅游於吳里巷之間有墳巋然問于人則曰吳將軍周公瑾之墓也予嘗覽前志壯公瑾之業歷於遺墟想公瑾之神息駕而弔徘徊不能去昔漢綱旣解當塗方熾利兵南浮江漢失險公瑾嘗用寡制衆挫強爲弱燎火一舉樓船灰飛遂乃張吳之臂壯蜀之趾以魏祖之雄武披攘躪躅救死不暇袁彥伯贊是功曰三光三分宇宙豔隔富哉言乎于是時彌遠而氣益振世愈往而聲不滅有由然矣詩人之作感於物動於中發於詠歌形於事業事之博者其辭盛志之大者其感深故仲山有過墓之什廓然其虛粲乎其文可以窺盤桓居貞之道梁父閑吟之意凡有和者當鑒於斯文

三良冢賦

劉禹錫

魯文六年秦伯任好卒以子車氏之三子奄息仲行鍼虎爲殉皆秦之良也國人哀之爲之賦黃
鳥君子曰秦穆之不爲盟主也宜哉先王違世猶貽之法而況奪之善人乎是以知秦之不復東
征也秋季月吾西遊汧渭出於岐雍之間於古道傍得三良塚心甚哀之涕泗者久之而去詞曰
昨宿岐城曉涉渭東霜凌雪結飛沙亂蓬中野躊躇屈此古墟野人曰卽車氏之冢方驅駕班如久
而咤曰吾嘗讀舊史矣古者秦氏大於穆公出師則寧東夏用賢則霸西戎大邦服其禮小邦畏其
雄謀已集戰亦武不能勤王不爲盟主者何居以滅天之良喪人之特百夫仰系一朝而陪可哀也
哉宛其三子遭時遘邇主已卽世身皆靡全指冥茫而爲期撫昭世而坐捐方惴惴以臨穴且哀哀
而號天從有言於寒原莽蕩千里迴眺無垠上刺衰德下傷幽魂挂驂壘樹脫劍山門撥野芳以爲
薦汲行潦而充罇矧今情之猶悲諒古恨之潛吞死而不作吾誰與言代事浩漭人壽爾天言念君
子中心悄悄哀生人之長慟赴永夕之莫曉歸去來兮不可留且悲吟於黃鳥

新遷李白墓碑

范傳正

騏驥筋力成意在萬里外歷塊一蹶斃於空谷唯餘駿骨價重千金大鵬羽翼張勢欲摩穹昊天風

不來海波不起塌翅別島空留大名人亦有之故左拾遺翰林學士李公之謂矣公名白字太白其先隴西成紀人絕嗣之家難求譜牒公之孫女搜於箱篋中得公之亡子伯禽手疏十數行紙壞字缺不能詳備約而計之涼武昭王九代孫也隋末多難一房被竄於碎葉流離散落隱易姓名故自國朝已來編於蜀籍神龍初潛還廣漢因僑爲郡人父客以逋其邑遂以客爲名高臥雲林不求祿仕公之生也先府君指天枝以復姓先夫人夢長庚而告祥名之與字咸所取象受五行之剛氣叔夜心高挺三蜀之雄才相如文逸瓌奇宏廓拔俗無類少以俠自任而門多長者車常欲一鳴驚人一飛冲天彼漸陸遷喬皆不能也由是慷慨自負不拘常調器度弘大聲聞于天天寶初召見於金鑾殿元宗明皇帝降輦步迎如見圖綺論當世務草答蕃書辯如懸河筆不停綴明皇嘉之以寶牀方丈賜食於前御手和羹德音褒美褐衣恩遇前無比儻遂直翰林專掌密命將處司言之任多陪侍從之遊他日泛白蓮池公不在宴皇歡既洽召公作序時公已被酒於翰苑中仍命高將軍扶以登舟優寵如是既而上疏請還舊山明皇甚愛其才或慮乘醉出入省中不能不言溫室樹恐撥後患惜而遣之公以爲千鈞之弩一發不中則當摧撞折牙而永息機用安能倣碌碌者落而復上哉

脫屣軒冕釋羈韁鏐因肆情性大放宇宙間飲酒非嗜其酣樂取其昏以自賞作詩非事于文律取其吟以自適好神仙非慕其輕舉將不可求之事求之欲耗壯心遺餘年也在長安時祕書監賀知章號公爲謫仙人吟公烏栖曲云此詩可以哭神鬼矣時人又以公及賀監汝陽王崔宗之裴周南等八人爲酒中八仙朝列賦謫仙歌百餘首俄屬戎馬生郊遠身海上往來於斗牛之分優游沒身偶乘扁舟一日千里或遇勝境終年不移長江遠山一泉一石無往而不自得也晚歲渡牛渚磯至姑孰悅謝家青山有終焉之志盤桓庀居竟卒於此其生也聖朝之高士其往也當塗之旅人代宗之初搜羅俊逸拜公左拾遺制下於彤庭禮降於冥壤生不及祿歿而稱官嗚呼命歟傳正生唐代甲子相懸常於先大夫文字中見與公有湯陽夜飲詩則知與公有通家之舊早於人間得公遺篇逸句吟詠在口無何叨蒙恩獎廉問宣池按圖得公之墳墓在當塗邑因令禁樵採備洒掃訪公之子孫欲申慰薦凡三四年乃獲孫女二人一爲陳雲之室一乃劉勸之妻皆編戶氓也因召至郡庭相見與語衣服村落形容朴瑩而進退閒雅應對詳諦且祖德如在儒風宛然問其所以則曰父伯禽以貞元八年不祿而卒有兄一人出遊一十二年不知所在父存無官父沒爲民有兄不相保爲

天下之窮人無桑以自蠶非不知機杼無田以自力非不知稼穡況婦人不任布裙糲食何所仰給
儷於農夫救死而已久不敢聞于縣官懼辱祖考鄉閭逼迫忍恥來告言訖淚下余亦對之泫然因
云先祖志在青山遺言宅兆頃屬多故殯於龍山東麓地近而非本意墳高三尺日益摧圯力且不
及知如之何聞之憫然將遂其請因當塗令諸葛縱會計在州得諭其事縱亦好事者學爲歌詩樂
聞其語便道還縣躬相地形卜新宅於青山之陽以元和十二年正月二十二日遷神於此遂公之
志也西去舊墳六里南抵驛路三百步北倚謝公山卽青山也天寶十二載敕改名焉因告二女將
改適於士族皆曰夫妻之道命也亦分也在孤窮旣失身於下里仗威令乃求援於他門生縱偷安
死何面目見大父於地下欲敗其類所不忍聞余亦嘉之不奪其志復并稅免徭役而已今士大夫
之葬必誌於墓有勳庸道德之家兼樹碑於道余才術貧虛不能兩致今作新墓銘輒刊二石一實
於泉扃一表於通路亦峴首漢川之義也庶芳聲之不泯焉文集二十卷或得之於時之文士或得
之於宗族編緝斷簡以行於代銘曰

嵩嶽降神是生輔臣蓬萊譴真斯爲逸人晉有七賢唐有八仙應彼星象唯公一焉晦以麴蘖暢于

文篇萬象奔走乎筆端萬慮泯滅乎樽前臥必酒饗行唯酒船吟風詠月席地幕天但貴乎適其所適不知夫所以然而然至今尙疑其醉在千日寧審乎壽終百年謝家山兮李公墓異代詩流同此路舊墳卑庫風雨侵新宅爽塏松柏林故鄉萬里且無嗣二女從民永于此猗歟琢石爲二碑一藏幽隧一臨岐岸深谷高變化時一存一毀名不虧

重修五代祖塋域記

宋韓琦

唐鎮冀深趙等州節度判官朝議郎檢校太子左庶子兼御史中丞賜紫金魚袋諱義賓琦之五代祖也初庶子以博學高節晦道不仕而鎮帥太傅王紹鼎雅知其名屢加禮辟庶子不得已而起補節度副記室事紹鼎卒其子太尉常山王景崇襲有父鎮益尊禮庶子奏授節度掌書記時巢賊犯闕僖宗幸劍南景崇率定帥王處存合鄰道兵入關進討關輔以平皆庶子謀也景崇卒其子太師鎔幼嗣父位府事一咨於庶子以義結鄰帥內尊王室朝廷嘉之故恩命累及以光啟二年八月十四日終於鎮府立義坊之私第年七十有五庶子曾祖諱肅沂州司戶參軍祖諱浦登州錄事參軍父諱全隱居不仕自隱居而上世葬深州博野蠡吾鄉之北原博野今爲永寧軍庶子以龍紀元年

十月十五日復祔葬於先塋夫人崔氏棣州司馬魯之長女婦道母訓爲世儀法終於天復二年七月十九日年八十有三其年八月十七日歸祔於庶子生二子長諱定辭鎮冀深趙等州觀察判官檢校尙書祠部郎中兼侍御史好學能文無所不覽嘗聘燕帥劉仁恭仁恭命幕吏馬彘以詩贈祠部頗銜己學祠部卽席酬之曰崇霞臺上神仙客學辨癡龍藝最多盛德好將銀筆述麗辭堪與雪兒歌一座愛其辭而不能解馬大屈服事且北夢瑣言次諱昌辭真定府鼓城令琦之高祖也爲政有惠愛而不壽年二十九而亡生一子諱璆廣晉府永濟令琦之曾祖也永濟始自璆吾北原徙鼓城與夫人張氏之喪葬於趙州贊皇縣太平鄉之北馬村先君令公始葬永濟與夫人史氏暨琦祖太子中允知康州諱構與夫人李氏葬於相州安陽縣之豐安村自先君之亡諸子幼而孤長而薄宦奔走四方故但能時奉豐安之祀其於北馬璆吾之塋則力莫能及年世殊邈幾於不能辨識嘉祐三年琦始得北馬之塋一新封植今年春遣男忠彥走璆吾又得庶子之塋於北原而先域之西北隅北距唐河數里之近嘗經霖潦暴漲浸淫及於庶子之塋且念神靈久宅不敢改卜乃於嘉祐八年七月一日遣男孝彥先啟墳自下以璆實而上絕沮洳而止衣衾棺柩易而新之然後塞隧廣

封以爲萬世之固逮遠祖諸塋率加治葺翦其荆棘而易以嘉木繚其垣墉而表以高閤既襄其事遂直書營繕之始末而納諸壙中且復誠於子孫曰夫謹家牒而心不忘於先塋者孝之大也惟墳墓祭祀之有託故以子孫不絕爲重琦自志於學每見祖先所爲文字與家世銘誌則知寶而藏之有遺逸者常精意搜掇未始少懈時加編緝寢以大備其所誌先域之所在雖距今百有餘年必思博訪而得之卒能不墜先業推及先塋之八世得以歲時奉事少慰嗣續之志向若家牒之不謹祖先文字之不傳雖欲究其宅兆而嚴事之其可得乎後世子孫不能勤而知此則與夫世之絕也何異子孫其誌之

孫王墓記

滕歲

出盤門三里有高塚或得其塚磚有文在側曰萬歲永藏問其傍老人曰孫王墓也又曰孫王長沙王也或傳其先世之說盜嘗發取藏金玉未竟敗獲有碑已斷缺不全止辨其中平年三字復拵之後郡置窰其傍取土爲磚埴號官窰後有授民田牧其上前常平使者剗叢塚建齊昇院與孫墓相附近院甫成會徙他官將去職一日始得其事立命其屬表之爲之表者不暇詢攷題曰先賢墓今

使者以失事實不可示久遠卽命吳縣主簿劉允武訂其事乃具條所得塚旁老人言以報屬戍記之按陳壽志長沙王宇伯符始受漢爵爲吳侯大皇稱帝追封長沙威王而其子紹嗣封於吳此墓當盜伐時有楊友夔舜韶者作詩弔之乃以爲孫堅墓陳壽志孫堅薨葬曲阿楊詩固已差謬則所傳長沙王者幾是按中平元年朱雋表堅爲佐軍司馬討張角楊蓋據碑有中平年字故定以爲堅而不攷其史江表傳載堅爲雋佐軍留家壽春長沙王方十餘歲已能與知名士交周瑜自舒來壽春勸王徙舒則碑之所稱或爲王也又壽志及裴松所補孫氏自堅而下皆書所葬地獨王不言葬而王之薨其將周瑜呂範皆赴喪於吳至大皇始用張紘計自吳徙秣陵則王之葬當在吳也然碑今既不存欲訂而表之其傳疑曰孫王墓者從俗稱也舜韶序其詩又稱盜所得塚中物有東西銀盃金搔頭握臂瓦薰鑪中灰炭猶存其物皆歸朱勔家實政和丙申也前使者詹姓名體仁字元善今使者徐姓名誼字子宜紹興三年三月日記

義塚記

徐次鐸

越之流風凡民有喪卽議僑寄棺柩所積夙號墓園連歲不登繼以癘疫而民不免於死亡公奉命

東來一意全活饑者賑之以粟病者起之於藥死者遺之以棺荒政舉行畢力無倦復有意於埋骼掩骼之舉命次鐸走近郊校數寄棺凡三千餘下令申飭曉告使人人知有送死之義且曰其有徇浮圖火化者助之緡姑從其私乃若無力歸藏請於官給所費規畫已定復命次鐸度地得二所其一鎮塢廣四十畝又其一洄湧塘十餘畝由是義塚之規立矣兩隅分峙男女以辨繚以牆封其四周圖傳籍備分藏閭里姓氏次第刻著申命緡黃以視墓室五封廣列尙爲後圖庶幾有以繼於此也自慶元改元夏汔於冬十月野處之棺官爲覆藏者凡千二百九十有三據籍可考至是澤及枯骨矣自今不燎於原不淪於川不暴於野則公拳拳之志也

伊尹墓碑陰記

金陳思忠

人有與天地立心與生民立命與萬世開太平者其惟阿衡伊尹乎嗚呼尹雖已往名留於史道載於經固無容贅辭也然其塋域歷世踰久人罕知者在所表而出之偃師縣爲今河南府之屬邑邑西十里曰尸鄉尹墓在焉按周書立政三亳史記正義曰偃師縣西南五里尸鄉南有亳版東有城卽伊尹放太甲處也實字記云湯都南亳在宋州穀城縣今廢按宋州卽今歸德州今有穀熟店皇

甫謚曰湯居亳與葛爲鄰今之靈陵縣有葛鄉睢州考城縣有北亳城是爲北亳師古曰皇甫之說不經愚按實字記所云與謚之說亦皆有理然以書考之盤庚自耿復遷於亳作書有曰古我先王將多于前功適于山鄭氏曰偃師東成皐南轅轅西降谷北依邙山故曰適於山也且商人歷世十九而都凡五遷皆由河決之患今歸睢之地雖有二亳皆平地迴野有河無山盤庚未必復欲遷於彼則湯放桀之後定都西亳明矣又按圖誌云伊尹旣沒沃丁以三公禮葬於西亳西北十里今云去田橫墓二百步愚因公由偃師過孟津道經墓下詢諸鄉老里有王文者諡曰余自父祖居尸鄉識此爲伊尹墓國初鄉先生程彥魯輩攷實載之圖經蓋文仕國朝二十年餘今以老謝政歸誠不妄人也且墓西有田橫塚相去僅二百步徵諸此而益信嗚呼尹以事君之誠發爲事業炳若日星充塞宇宙不隨時而化不易世而泯雖一抔之土百世之下猶使人仰之若泰山然豈人力所能致哉爰立貞珉鏤著姓氏且勒其事於碑俾後人知所敬慕云

復修鄒忠公墓詩序

元脫脫木兒

至正庚寅冬常之監郡太守率僚屬祭道鄉先生鄒忠公之墓土君子莫不賦詩以頌休德俾予題